

P R E A M B U L

Co jari frut e no vevi scuela, jo lavi jù pai ciamps di bore San Roc a cuei flors.

Jarin margaritis, papavars, garofui salvadis e qualchi flor di trifuei.

Mé donamari co mi viodeva vigní, si la gioldeva un mont, mi strenzeva dongia di je e po mi dava una bussada...

Jò, content, corevi su la strada e mi rampinavi, cumi un scuiatul, su pa la muraia da la braida dal cont Lantieri par cuei li scarputis da la Madona, che cressin ta pieris, e gi li puartavi ancia ches par ingrandí il mac.

Mé donamari mi cuntracambiava cul contámi, co jari tal jet, una di ches storiutis che je saveva, e che a me mi plasevin tant.

E contava, e contava mé donamari, e ogni tant mi domandava: « Síntistu, Mariut, o duarmis? » Jo, tra la vea e il sun gi rispundeve: « Sí, mamuta! »

Ma jara rara la volta che rivavi sintí la fin dal racònt, parzè mi induarmidivi za un biel piezón prima.

Jarin storiutis, che mé donamari veva sintudis contá di so von e di so ava o sot i volz di Sant Antoni co jara píz-zula, storiutis, che parevin vé alc di fundament ma che invezzi jarin nassudis da la fantasia da la nostra int, storiutis sèmplizis ma bielis, cumi dut chel che nàs dal font dal cur.

Dopo tanc', e tanc' ain, che son passàz, mé donamari cumò li torna contá a una frutuzza, che la sta sintí cu la bocia aviarta e che po gi ven voia di contális ancia a je: la bambinuta 'l è mé fia Geniuta, che jer veva tre ain e miez; jo crodi che a ché etàt mi lis varà contadis ancia a me.

Cussí stant sintí co gi lis conta, jo lis scrivi e, cumò che no mi induarmidissi plui, podi sta sintí ancia la fin e fáigila savé a chei che uaràn leilis.

Son rosis di ciamp ancia chistis storiutis, che jo li cuei cun dut il mé afiet, tal lengàz di ché tiara, che mi jà viodùt nassi, di Gurizza la Santa, che sperì lis azzetarà cun compatiment di mari...

Parenzo, 6 di novembar, sant di mé nono Nardùz, 1929 - VIII.

R. M. COSSÀR